



# SLUŽBENE NOVINE TUZLANSKOG KANTONA

GODINA 9 • TUZLA, PETAK, 29. MART/OŽUJAK 2002. GODINE • IZDANJE NA BOSANSKOM I HRVATSKOM JEZIKU • BROJ 3

53

Na osnovu poglavlja IV, odjeljak B, člana 33. stav 1. tačka e) Ustava Tuzlanskog kantona, donosim

## UKAZ

### O PROGLAŠENJU ZAKONA O IZDAVAČKOJ DJELATNOSTI

Progllašava se Zakon o izdavačkoj djelatnosti, koji je donijela Skupština Tuzlanskog kantona na sjednici od 28. 2. 2002. godine.

Broj: 01-192/02  
Tuzla, 11. 3. 2002. godine

Predsjednik  
Tuzlanskog kantona,  
**Mr. Selim Bešliagić, v.r.**

## ZAKON

### O IZDAVAČKOJ DJELATNOSTI

#### I. OSNOVNE ODREDBE

##### Član 1.

Ovim Zakonom uređuju se opći uslovi i način obavljanja izdavačke djelatnosti, izdavanje i upotreba školskih udžbenika i drugih nastavnih sredstava i druga pitanja od značaja za obavljanje izdavačke djelatnosti.

##### Član 2.

Izdavačka djelatnost, u smislu ovog Zakona, obuhvata izdavanje publikacija i publikacija posebne namjene.

Publikacija, u smislu ovog Zakona, je knjiga, časopis, revija, godišnjak, brošura, separat, muzičko djelo, reprodukcija umjetničkih slika i crteža, katalog, plakat, obrazac, razglednica, fotografija, dijapozitiv, gramofonska ploča, audio kasete, video kasete, CD-rom i drugo djelo koje se umnožava štampanjem, elektronski ili na drugi način.

Publikacija posebne namjene, u smislu ovog Zakona, je:  
- posebno vrijedna knjiga stručnog, naučnog, umjetničkog, kulturnog i obrazovnog karaktera.

- udžbenik za predškolski odgoj i obrazovanje, osnovni odgoj i obrazovanje, srednje i visoko obrazovanje (u daljem tekstu: udžbenik) i nastavno sredstvo za predškolski odgoj i obrazovanje, osnovni odgoj i obrazovanje, srednje i visoko obrazovanje (u daljem tekstu: druga nastavna sredstva).

Publikacijama posebne namjene, u smislu ovog Zakona, smatraju se i udžbenici, priručnici i druga nastavna sredstva urađena u tehnikama dostupnim slijepim i slabovidnim licima.

Ne smatraju se publikacijom, u smislu ovog Zakona, štampani i na drugi način umnoženi primjerci službenog materijala koji isključivo služe za unutrašnji rad državnih i drugih organa, udruženja i drugih pravnih i fizičkih lica, kao i originalna likovna djela koja nastaju umnožavanjem.

##### Član 3.

Poslovi izdavanja udžbenika i nastavnih sredstava su od posebnog društvenog interesa.

#### II. IZDAVANJE PUBLIKACIJA

##### Član 4.

Izdavanjem publikacija može se baviti ustanova, trgovačko društvo, državni organ, zadruga, udruženje građana, vjerska zajednica i fizičko lice (u daljem tekstu: izdavač), u skladu sa zakonom.

##### Član 5.

Za svaku publikaciju izdavač ima urednika. Isto lice može biti urednik za više publikacija.

Izdavač može imati i glavnog urednika.

##### Član 6.

Za izdavanje publikacije odgovoran je urednik, a ako izdavač ima glavnog urednika, odgovoran je glavni urednik, u skladu sa zakonom.

##### Član 7.

Za prvo i svako izmijenjeno izdanje publikacije, izuzev godišnjaka, izdavač je dužan obezbijediti najmanje dvije stručne recenzije.

Recenzent je lice koje je priznati stručnjak iz oblasti iz koje se izdaje publikacija.

Izbor recenzenta vrši izdavač, u skladu sa kriterijima za izbor recenzenata.

Recenzije su javne i, kao takve, dostupne svim zainteresiranim licima.

Za publikaciju, koja je već objavljena na teritoriji Bosne i Hercegovine, na jeziku koji je u službenoj upotrebi, ne mora se obezbijediti stručna recenzija.

Bliži propis o kriterijima i postupku izbora recenzenata, iz stava 3. ovog člana, donosi ministar obrazovanja, nauke, kulture i sporta Tuzlanskog kantona (u daljem tekstu: ministar).

## Član 8.

Na svakoj izdatoj publikaciji mora biti naznačeno: ime autora, ime urednika, odnosno glavnog urednika, ime recenzenata za prvo i svako izmijenjeno izdanje, ime prevodioca, ime ilustratora, ime autora fotografija, ime lektora i korektora, ime tehničkog urednika, naziv i sjedište izdavača, broj izdanja, godina izdavanja, godina štampanja, naziv i sjedište štamparije i broj štampanih primjeraka.

Na svakom primjerku knjige nose se podaci o publikaciji (CIP) i međunarodni standardni knjižni broj (ISBN), kojeg određuje biblioteka, odnosno drugo pravno lice ovlašćeno za određivanje ovog broja.

Na reprodukcijama umjetničkih slika i crteža, katalogu, plakatu, obrascu, razglednici i fotografiji unosi se naziv i sjedište izdavača i godina izdavanja, na način prilagođen vrsti publikacije.

Na dijapozitivima, gramofonskim pločama, audio kasetama, video kasetama i CD-romu unosi se naziv i sjedište izdavača i godina izdavanja, na način prilagođen vrsti publikacije, a ostali podaci mogu se navesti na omotnici ili posebnom dodatku.

## Član 9.

Izdavač publikacije i publikacije posebne namjene je dužan Biblioteci Kantona besplatno dostaviti pet primjeraka izdate publikacije, a Nacionalnoj i univerzitetnoj biblioteci Bosne i Hercegovine i javnoj biblioteci na svom općinskom području po jedan primjerak izdate publikacije.

### III. IZDAVANJE I UPOTREBA UDŽBENIKA I DRUGIH NASTAVNIH SREDSTAVA

## Član 10.

Udžbenik, u smislu ovog Zakona, je publikacija posebne namjene, koja se kao osnovno nastavno sredstvo koristi u odgojno-obrazovnom procesu.

Drugo nastavno sredstvo, u smislu ovog Zakona, je priručnik, radna sveska, zbirka zadataka i druga literatura, koja zamjenjuje ili dopunjuje udžbenik ili je njegov sastavni dio.

Udžbenik i drugo nastavno sredstvo moraju biti u skladu sa nastavnim planom i programom i koncepcijom za izradu udžbenika.

## Član 11.

Izdavanjem udžbenika i drugih nastavnih sredstava mogu se baviti izdavači registrirani za obavljanje izdavačke djelatnosti.

## Član 12.

Izdavač udžbenika i drugog nastavnog sredstva mora imati urednika sa odgovarajućom visokom stručnom spremom za svaki udžbenik i drugo nastavno sredstvo, u skladu sa ovim Zakonom i općim aktom izdavača.

## Član 13.

Udžbenik i drugo nastavno sredstvo izdaje se po odobrenju Ministarstva obrazovanja, nauke, kulture i sporta Tuzlanskog kantona (u daljem tekstu: Ministarstvo).

Odobrenje iz stava 1. ovog člana, objavljuje se u "Službenim novinama Tuzlanskog kantona".

## Član 14.

Odobrenje za upotrebu udžbenika i drugog nastavnog sredstva u odgojno-obrazovnom procesu daje se na prijedlog

Savjeta za izdavanje udžbenika i drugih nastavnih sredstava (u daljem tekstu: Savjet).

Savjet imenuje Skupština Tuzlanskog kantona na prijedlog Vlade Tuzlanskog kantona.

Savjet ima predsjednika i osam članova.

Predsjednik i članovi Savjeta imenuju se na period od dvije godine i mogu biti ponovo imenovani.

## Član 15.

Savjet daje prijedloge na osnovu mišljenja Stručnih komisija za odabir udžbenika i drugih nastavnih sredstava (u daljem tekstu: Stručna komisija).

Udžbenik i drugo nastavno sredstvo izdato, po odobrenju Federalnog ministarstva obrazovanja, nauke, kulture i sporta, ne podliježe ocjeni Stručne komisije iz predhodnog stava ovog člana.

Stručne komisije, iz stava 1. ovog člana, imenuje ministar na prijedlog Savjeta.

## Član 16.

U okviru svog djelokruga rada Stručna komisija:

- sprovodi konkurs za pribavljanje rukopisa udžbenika i drugih nastavnih sredstava i vrši izbor recenzenata, u skladu sa kriterijima za odabir udžbenika i drugih nastavnih sredstava i izbor recenzenata,

- daje mišljenja Savjetu o pribavljenim rukopisima udžbenika i drugih nastavnih sredstava.

Bliži propis o sastavu i načinu rada Stručne komisije i o kriterijima, iz stava 1. alineja 1. ovog člana, donosi ministar.

## Član 17.

Udžbenik i drugo nastavno sredstvo se izdaju u skladu sa postupkom propisanim za izdavanje udžbenika i drugih nastavnih sredstava.

Bliži propis o postupku pripremanja i izdavanja, rokovima izdavanja i drugim pitanjima u vezi sa izdavanjem udžbenika i drugih nastavnih sredstava, donosi ministar.

## Član 18.

Za prvo i svako izmijenjeno izdanje udžbenika i drugog nastavnog sredstva izdavač je dužan obezbijediti najmanje dvije stručne recenzije.

Recenzent je stručno lice iz predmetne oblasti iz koje se izdaje udžbenik i drugo nastavno sredstvo, koji je izabran u postupku izbora recenzenata.

Troškove obezbjeđenja stručnih recenzija snosi izdavač.

## Član 19.

Udžbenik i drugo nastavno sredstvo, koji su u upotrebi na području Tuzlanskog kantona (u daljem tekstu: Kanton) izdaju se na jeziku koji je u službenoj upotrebi na području Kantona.

Ministarstvo, po potrebi, može odobriti izdavanje i upotrebu udžbenika na jezicima drugih naroda, kao i na stranim jezicima.

## Član 20.

Ministarstvo može odobriti da se u odgojno-obrazovnom procesu na području Kantona koriste udžbenici i druga nastavna sredstva, koja su odobrena za upotrebu u drugom Kantonu na teritoriji Federacije Bosne i Hercegovine ili na teritoriji Bosne i Hercegovine, ukoliko su urađeni u skladu sa koncepcijom za izradu udžbenika i usklađeni sa odgovarajućim nastavnim planom i programom.

## Član 21.

Na svakom primjerku izdatog školskog udžbenika i drugog nastavnog sredstva, pored podataka utvrđenih u članu 8. ovog Zakona, navodi se i naziv i namjena školskog udžbenika i drugog nastavnog sredstva i broj i datum odobrenja iz člana 13. ovog Zakona.

**IV. KAZNENE ODREDBE**

## Član 22.

Novčanom kaznom od 500 KM do 5.000 KM kaznit će se izdavač za prekršaj:

- ako ne obezbijedi urednika sa odgovarajućom visokom stručnom spremom za svaki udžbenik i drugo nastavno sredstvo (član 12. ovog Zakona),
- ako izda školski udžbenik i drugo nastavno sredstvo bez odobrenja Ministarstva (član 13. ovog Zakona),
- ako izda udžbenik i drugo nastavno sredstvo suprotno odredbama člana 17. ovog Zakona,
- ako ne obezbijedi stručne recenzije za prvo i svako izmijenjeno izdanje udžbenika i drugog nastavnog sredstva (član 18. ovog Zakona).

Za prekršaje, iz stava 1. ovog člana, kaznit će se i odgovorno lice izdavača novčanom kaznom od 300 KM do 1.000 KM.

## Član 23.

Novčanom kaznom od 400 KM do 3.000 KM kaznit će se izdavač za prekršaj ako:

- Biblioteci Kantona, Nacionalnoj i univerzitetskoj biblioteci Bosne i Hercegovine i javnoj biblioteci na svom općinskom području besplatno ne dostavi obavezne primjerke izdate publikacije (član 9. ovog Zakona) i
- na udžbeniku i drugom nastavnom sredstvu ne naznači podatke iz člana 21. ovog Zakona.

Za prekršaj, iz stava 1. ovog člana, kaznit će se i odgovorno lice izdavača novčanom kaznom od 300 do 1.000 KM.

## Član 24.

Novčanom kaznom od 300 KM do 2.000 KM kaznit će se za prekršaj izdavač publikacije:

- ako ne obezbijedi urednika za svaku publikaciju (član 5. ovog Zakona),
- ako ne obezbijedi stručne recenzije za prvo i svako izmijenjeno izdanje publikacije (član 7. ovog Zakona) i
- ako na publikaciji ne naznači podatke iz člana 8. ovog Zakona.

Za prekršaj, iz stava 1. ovog člana, kaznit će se i odgovorno lice izdavača novčanom kaznom od 100 KM do 800 KM.

**V. PRIJELAZNE I ZAVRŠNE ODREDBE**

## Član 25.

Izdavanje školskog udžbenika i drugog nastavnog sredstva, koje je na dan stupanja na snagu ovog Zakona u toku, okončat će se po postupku po kojem je izdavanje započeto, a najkasnije u roku od jedne godine od dana stupanja na snagu ovog Zakona.

## Član 26.

Ministar će, u roku od šest mjeseci od dana stupanja na snagu ovog Zakona, donijeti:

- bliži propis o kriterijima i postupku izbora recenzenata (član 7. ovog Zakona),
- bliži propis o kriterijima za odabir udžbenika i drugih nastavnih sredstava i izbor recenzenata (član 16. ovog Zakona) i
- bliži propis o postupku pripremanja i izdavanja, rokovima izdavanja i drugim pitanjima u vezi sa izdavanjem udžbenika i drugih nastavnih sredstava (član 17. ovog Zakona).

## Član 27.

Stupanjem na snagu ovog Zakona, na području Tuzlanskog kantona, prestaje da važi Zakon o izdavačkoj djelatnosti ("Službeni list SR BiH", br. 35/90 i "Službeni list RBiH", br. 3/93 i 23/93).

## Član 28.

Ovaj Zakon stupa na snagu osmog dana od dana objavljivanja u "Službenim novinama Tuzlanskog kantona".

Bosna i Hercegovina  
Federacija Bosne i Hercegovine  
TUZLANSKI KANTON  
Skupština  
Broj: 01-02-238-26/01  
Tuzla, 28. 2. 2002. godine

Predsjednik  
Skupštine Tuzlanskog kantona  
**Dr. Izet Žigić, v.r.**

**53**

Na temelju poglavlja IV, odjeljak B, članka 33. stavak 1. točka e) Ustava Tuzlanskog kantona, donosim

**UKAZ****O PROGLAŠENJU ZAKONA O  
IZDAVAČKOJ DJELATNOSTI**

Prolašava se Zakon o izdavačkoj djelatnosti, koji je donio Sabor Tuzlanskog kantona na sjednici od 28. 2. 2002. godine.

Broj: 01-192/02  
Tuzla, 11. 3. 2002. godine

Predsjednik  
Tuzlanskog kantona,  
**Mr. Selim Bešliagić, v.r.**

**ZAKON****O IZDAVAČKOJ DJELATNOSTI****I. TEMELJNE ODREDBE**

## Članak 1.

Ovim Zakonom uređuju se opći uvjeti i način obavljanja izdavačke djelatnosti, izdavanje i uporaba školskih udžbenika i drugih nastavnih sredstava i druga pitanja od značaja za obavljanje izdavačke djelatnosti.

## Članak 2.

Izdavačka djelatnost, u smislu ovog Zakona, obuhvata izdavanje publikacija i publikacija posebne namjene.

Publikacija, u smislu ovog Zakona, je knjiga, časopis, revija, godišnjak, brošura, separat, glazbeno djelo, reprodukcija umjetničkih slika i crteža, katalog, plakat, obrazac, razglednica, fotografija, dijapozitiv, gramofonska ploča, audio kazeta, video kazeta, CD-rom i drugo djelo koje se umnožava štampanjem, elektronski ili na drugi način.